

編號 1 號

【承水】林伯殷原作

落水咧！落水咧！看著大水點跔等風對佢掃過來，心肝肚正在該想，這陣水望還久哪！望到圳溝燥忒、河壩燥忒、水庫乜燥忒咧！望到連田泥就必開來咧！佢正想愛摻手伸出屋簷下摸一下久見个雨水，盲知無兩下，屋簷水就瀉往出，打在地泥下滴滴落¹，大嬖牯聲提醒佢，講這水毋會細哦，仰做得打爽忒！佢黏時去尋水桶放在屋簷下承水，想……等水張淦个時節，好倒落水庫貯起來，看做得毋使再過限水無？

看等、看等，水桶承个水緊來緊淦，佢个心肝頭就越來越歡喜，感覺落大水還好哪！早恁久咧，滿哪都燥絲絲，有大水來解決欠水，還有麼个比這較好个？佢个心肝變到盡貪，想……一陣大水仰會罇，係水無落較久兜、落較多兜，膠水庫撐到飽飽，若係太陽公三、兩下又弄等出來²，該就無結煞咧！又毋知愛望水望到幾時？好得屋簷水還係直直瀉，水桶還係當當承，一桶、兩桶、三桶……，水桶承个水淦了又淦，佢斯像人看著水庫个水溢

¹ 滴滴落落：音 did` did` dab` dab`；形容雨滴打在地面或物體上所發出的聲音。

² 弄等出來：音 nung` nen` chud loi；鑽著出來。

出來³樣，實在還歡喜哪！

過一站，水變細咧，屋簷水變成一點一點慢慢跌到水桶肚，佢聽著涿、涿、涿个聲音，忽然間想起老屋个承水聲，該屋外落大水，屋肚落細水个時節，地泥下排等个盆頭鉢仔，分屋頂跌下來个水點打出滴滴涿涿⁴个聲音，還會隨等落大水變遠、落細水變慢，暗晡頭係睡在眠床頂，用聽就知外背个水落有幾大。係堵著風搓，水掃掃滾⁵，又聽著屋肚滴滴涿涿个承水聲，該就愛大愁屋頂毋知會承毋贏風雨，嘎塌下來無！平平係承水，仰在屋簷下摻屋肚會有恁大个爭差呢？好得這下人大體戴樓屋，毋使再過看著落大水就愁屋肚愛承水無！

天公還惜偲哪！連連續續又落好久个水，各地水庫个水位升加已多，照理講，大家較毋使驚無水好用咧，毋過，佢還係知有落水，就會尋桶放在屋簷下承水，想留加兜水來用，聽等該滴滴涿涿个聲音，佢个心肝肚無半點愁慮，嘎有一種當滿足个感覺。

³ 溢出來：音 pun chud loi；滿出來。

⁴ 滴滴涿涿：音 did` did` dug` dug`；形容水滴滴在地面或物體上所發出的聲音。

⁵ 掃掃滾：音 so` so` gun`；用槍枝連續掃射的樣子。

編號 2 號

【大菜个一生】劉瑋原作

屋側角阿爸、阿姆改个菜園，熱天時節，長豆、粉豆豉等竹杈搭个豆角¹爬等上，青里里仔，豆仔像吊晃槓樣晃來晃去，下把仔又有蝶仔飛上飛下，脣頭還有茄仔、笏瓜，瓠仔膠菜瓜，食就食毋去。冬下頭个菜廂係無共樣个景色，一片係菜筍、高麗菜、青花菜，還一片係包心白、大菜、菜頭。一點一點个露水跌在這兜菜葉頂高，日頭晟來，該金金个水珠，講毋出有幾靚。

佢特別毋好食苦丟丢个大菜，總係恁毋解「到底有麼个好吃呢？」係換做佢个加工品：鹹菜、覆菜、鹹菜乾，佢試著逐樣都好食，逐樣佢也盡好食。

到大菜好斬咧，愛遽遽割下來，趕天時好來晒鹹菜，晒一兩日過，先掙鹽、出暗力掙，再過輕輕仔个分佢軟熟，愛有么熟么軟、出水，到鼻著羴味，正續等疊落檯肚，用石頭砵等，阿姆講：「驚怕露水會跌落去，最頂高先奔亞鉛餅，再過用石頭砵等，亞鉛餅正毋會分野狗、野貓蹶跌下來，無斯分大風吹走。」鹹菜檯愛放在歸日晒得著日頭个位所，愛砵大約兩到三禮拜。佢

問：「鹹菜有辦法算準哪日正做得在檯肚起來無？」阿爸講：「經驗係最好个師父，愛看天時、溫度來決定。」

起鹹菜愛注意該日个天時，係愛晒覆菜、鹹菜乾，定著愛選日頭當烈个時節，鹹菜正做得起起來直接晒。還過，張好一包一包个鹹菜做毋得晒著日頭，無會變色就毋靚咧！佢屋下个鹹菜係做一擺全部起起來，有兜自家食，有兜送親戚朋友，還較多个係拿來晒覆菜膠鹹菜乾。

做覆菜膠鹹菜乾，愛膠鹹菜一皮一皮擘開來，攤平分日頭晒，晒到半燥溼，膠蒂頭切忒，再過膠莖還過葉仔切開來。脰乾个鹹菜莖，愛用箸無斯細竹枝塞落玻璃盞肚抑纏來，最面頂正抑鹹菜尾。抑好，盞仔倒覆放，就做得吸收覆菜發過个味，倒覆有一年以上就做得食咧，這就係覆菜。割下來个鹹菜葉尾晒到全燥，絹歸球再過晒到逐皮酥酥，這就係鹹菜乾。

對大菜變到鹹菜，再過變到覆菜、鹹菜乾，逐隻時期都有無共樣个料理——炒疍腰菜、鹹菜豬肚湯、覆菜剁肉丸、鹹菜乾炊豬肉，分人留下盡深个印象，大菜个一生正經當精彩！

¹ 豆角：音 teu⁺ li⁺；給豆類植物攀爬的竹竿。

編號 3 號

【家鄉个名產】朱淑琴原作

車仔行過鬧熱个都市，來到好山好水个莊下。白白个雲在天頂游啊游仔，青里里个田連到山腳下，風涼沁涼沁，一陣陣个青草味鑽落鼻空，這就係个家鄉——臺灣个長壽村「關西」。講著關西，就會分人想著有名个「仙草」咧！

阿公、阿婆戴在關西，阿公係煞猛个耕種人，屋下也有種仙草。嫩嫩幼幼个仙草，葉仔細細皮、有絨毛，矮矮仔無幾高，一大遍仙草田，差毋多半年就做得收成，割下來再過放在禾埕晒，晒到燥燥，就做得煮來食。

「阿公，該草仰安到仙草呢？」細細該下，當好問支柄來擎¹个侄緊問阿公。阿公就摺侄講：「頭擺人做田事、行山路，日頭上煎下燂²，晒到頭暈腦疫懶拐拐仔，恁堵好！毋知麼儕好心煮仙草茶來分大家食，大家咁了毋單淨毋會熱著！還嘎精神起來，斯講該怕係仙人送草來个哦！還有一種講法：仙草茶煮一鑊，摺兜太白粉攪攪仔，鮮鮮个變醃醃咧，看起來當大鑊，斯講，該怕係

¹ 問支柄來擎：音 mun' gi' biang' loi kia；打破砂鍋問到底。

² 上煎下燂：音 shong' zien' ha' bed；形容烈日當空非常炎熱。

仙人來變个！所以『仙草』也安到『仙人草』。」

仙草晒燥來燂水，清涼解毒人人愛。一埕仙草剝剝仔，加兜冰砵、摺兜糖，軟軟滑滑透心涼！日頭烈烈个熱天，食仙草最退火；冷天時節，寒風咁咁滾，冷到嚟嚟掣，一碗燒仙草，加紅豆、綠豆摺地豆，無斯芋圓、粉圓、細版圓共下食，燒氣衝天，食到笑連連！滑溜个仙草，對喉嚨頭溜到肚尿肚，燒暖个感覺七流到歸膺身，實在還享受哦！

仙草也做得做鹹个料理，阿婆用仙草來燂土雞仔，加兜紅棗、枸杞落去，烏金烏金个雞湯，有特別錫人个味緒，看著口水就落落跌！這仙草雞湯分人補身體、有元氣，侄見擺都食到咁嘴攞鼻³！

時代緊進步，仙草經過千年百載無分人擢忒，顛倒還較受人歡迎！傳統市場、超級市場，全有佢个身影。這下，最時行个手搖飲料店，仙草乳茶長透賣到淨淨、空空！去到關西名產店，唉哦！還有即溶仙草粉、仙草麵條、仙草茶箍哦！

「一寸土地一寸情，千金難買故鄉情。」仙草毋單淨係客家⁴人愛，還較係大家都知个好名產。實在講：天地精華在這草町⁴，清涼補肝又退火，冷燒鹹甜滋味好，關西仙草最係實！想到家鄉个名產，侄就感覺歡喜又光榮啊！

³ 咁嘴攞鼻：音 she' zhoi' liab' pi'；食物美味讓人意猶未盡。

⁴ 草町：音 co' nen'；草裡。

編號 4 號

【遊寮溫泉鄉】徐姿華原作

寮日，阿爸帶佢兜去谷關遠寮，車仔行在東西橫貫公路上，窗門外藍天白雲、青山綠水間个各色農舍，分人心情開朗，精神舒爽。

阿爸安排先去八仙山森林遊樂區蹶山，這位个天當清、空氣也當好，比平地較涼爽，驚冷个八仙山主峰還圍等一圈蓬白个濛沙頭纏仔呢！停車場脣，有幾下頭慢開个水紅色山櫻花，摺正暴出嫩青幼芽个松樹，還有幾頭開到榮榮个雪白李花，蜂仔、蝶仔在花間趲上趲下，拂等背後深深淺淺个綠色樹林。

春天摺八仙山變做畫布，靚到耐毋得；毋驚人个畫眉、山雀摺五色鳥，在樹桮頂跳上跳下，這片啾啾、該片嘰嘰，像在該比賽唱歌，實在還錫人啦！佢兜跔等步道慢慢蹶往上，行在浸青个竹林肚，風一吹，竹葉斯嘶嗖¹，像搶等講歡迎佢兜來寮，日頭花對竹葉縫箭出來，篩出一絲一絲、一點一點金黃色个光線，委到歸地泥，斯像仙境樣。

蹶山流到一身汗，佢兜斯去飯店泡溫泉。谷關个溫泉係碳酸

泉、略略仔白色，有一息硫磺味，係中臺灣當老个溫泉，既經有百零年个歷史，日本明治天皇還摺這溫泉賜名「明治溫泉」呢！阿姆想去泡露天溫泉，佢講屋外背有風較涼，泡溫泉較鬆爽。露天溫泉逐窟个溫度無共樣，做得擇自家適合个溫度來泡，阿爸、阿姆摺洗過冷水个面帕，摺好放在頭那頂，講恁樣正毋會熱到頭那艱苦，佢兜目密密泡溫泉、打嘴鼓，像人當享受樣。

佢摺老妹無時間，這窟泡一下、該窟浸下仔，一下燒、一下冷，試著當好搞；恁多窟溫泉肚，最生趣个係有一窟淺淺个溫泉，裡肚有當多花色个溫泉魚，佢兜个腳一伸落去，魚仔斯洄兼來，相爭背佢兜腳盤摺腳趾罅个皮，這兜魚仔拈拈又痒²又撓人³，害佢兜笑到吃吃滾⁴，無結無煞。

泡好溫泉，老妹笑講大家个臉身浸到紅紅，當像煮熟个蝦公，佢試著大家坐在溫泉窟肚，燒氣緊衝，當像在該煮火鑊。阿姆講泡好溫泉，皮膚變較幼、較滑，阿爸試著歸身鬆爽、精神加已好。泡溫泉帶分佢兜無共樣个趣味呢！下後佢兜散步去電廠招待所買枝冰食，泡溫泉泡到熱熱，坐在樹下吹等涼涼个風，咬一口冰冰甜甜个枝冰，實在還幸福哪！

² 痒：音 hoi；癢。

³ 撓人：音 neu` ngin；搔人家癢。

⁴ 吃吃滾：音 kid` kid` gun`；張聲詞，指笑聲。